

四庫全書

集部

欽定四庫全書

吳文正集卷九十四

元 吳澄 撰

七言律詩

勉學吟

四首

三十年前好用工男兒何者謂英雄世間有事皆當做  
天下無堅不可攻萬里行方由足下一毫非莫入胷中  
拳拳相勉無他意三十年前好用工

又

三十年前好用工日間莫只恁從容養成驕習皆因富  
賤過流光只為慵人不修為何異獸蛇能變化即成龍  
拳拳相勉無他意三十年前好用工

又

三十年前好用工為師不過發其蒙十分底蘊從人說  
百倍工夫自己充舊學要加新學養今朝不與昨朝同  
拳拳相勉無他意三十年前好用工

又

三十年前好用工過時學力强求通從頭莫枉青春日  
卅角俄成白髮翁既冠當除嬰孺態居今貴有古人風  
拳拳相勉無他意三十年前好用工

歌風臺

黃屋巍巍萬乘尊千秋游子故鄉魂韓彭自取夷三族  
平勃那堪託後昆湛露迄今王迹熄大風終古霸心存  
當時儘自規模遠誰起河汾與細論

過種湖觀訪雷空山不遇因見其所註莊子留

詩贈之

鈎探十翼象外意羅絡三倉篇內文道德五千聯貫密  
逍遙第一寸錨分此邦前有王元澤後世詎無揚子雲  
吾取二書還注我何當商畧重云云

贈月鑑相士劉德輝

眼前見物定姍姍皎月當空一鏡懸大地山河三萬里  
先天氣數幾千年固知神識無塵滓猶恐仙機有度權

上等相人非色相內觀玄覽更超然

燕城

燕絡中原東北去吳通上國古今奇五千里外只如此  
數百年來幸見之弔望諸墳吾有淚擊漸離筑世無知  
西山綿亘三關險日日羶車鐵馬馳

呈留丞相

三首

峻望晴簪插碧空幾年四海想流風雪霜薺麥冬春一  
日月蓬蒿晝夜同天欲托箕傳九法人能知惠畧三公

吾儒實用存經濟事事論量及物功

又

春風座上誨渠渠萍水相逢納拜初生復得知前日事  
聞多端勝十年書正人以道自出處直道於人何毀譽  
或是堯夫奇叔弼敢云太史證無且

又

與世相違分陸沉半生藏息寄書林只今沂水春風樂  
千古寒江秋月心芥紫外遺尋尺利草玄賓送寸分陰

此行大有遭逢處岱岳高高河瀆深

用贈李燦然韻述懷

故里香杭滑欲流歸田計晚愧遲留懸知海上三山客  
塵視人間萬戶侯南去擬尋吳市卒北來喜共李仙舟  
玄翁一室渾無白誰識王龔貢鮑優

墨詩壽趙中丞

老松換骨德玄玄來壽人間栢府仙描寫精神長照世  
發揮光彩上通天一真不受丹青變百物難磨鐵石堅



耐久結交濃淡等清名留取共千年

題林西隱居

黃岩郭外道林西隱者居之人不知遠去世氛春日永  
邈來鍾韻晚風遲從渠燕雀賀千厦得似鷓鴣安一枝  
想見吳興子昂字京華萬里寄新詩

和相山提點黃平仲

雲表飛來語詰盤新詩轉燠破春寒英英霞影籠扶若  
耿耿星文認莫千萬象滿前供物料雙峯高處築吟壇

山靈更要哀翁記  
軒豁乾坤露兩端

送征東儒學提舉教止善榮還高安

男兒弧矢四方身  
直欲飛騰作貴人  
膝下數千餘里遠  
客中十又一年春  
乘桴豈愛九夷俗  
奉檄聊娛八袞親  
此去東風歸袂軟  
故園花鳥亦欣欣

依韻奉答明極講主禪師

吾鄉平地絕梁闢  
頗異危途費仰攀  
每想尋常超物表  
劇慙一再到山間  
有茶共啜促膝話  
無物可持空手還

彼此相期崇令德不然重見有何顏

立春日寓北方賦雪詩

臘轉洪鈞歲已殘東風剪水下天壇  
騰添吳楚千江水壓到秦淮萬里山  
風竹婆婆銀鳳舞雲松偃蹇玉龍寒  
不知天上誰橫笛吹落瓊花滿世間

寄贈盱江名醫湯又新

一泓碧玉活人泉三世修治功行圓  
普為貧民甦死命更令孝子壽親年  
麻姑昔日栽桑地董奉今時種杏天

不借虛言作輕重實能世世大名傳

次別易耕雪

別去家山經幾年乍歸又着嶺南鞭  
雙眸眩眊番船載滿口腥鹹海物鮮  
胃次冰霜寧受滓世間粉黛自爭妍  
早來共此青春樂日暖風和無際邊

書別李燦然

番陽李燦然延祐戊午進士丞崇仁  
六年乃得代赴部謁選改通山縣尹  
在京共處月餘會予

移疾還家又同舟而南將及廣陵為賦七言四  
韻以叙別情泰定乙丑九月晦日也

盛世興賢得勝流六年貳令小淹留日邊普受九天涯  
江上升遷百里侯史館西偏饜共話家山南望喜同舟  
疲民延頸需恭茂撫字催科定兩優

送幾泉石上人南歸

春風吹醒泉石夢一錫飛來到日邊世界空花俱幻爾  
家山老木故依然飄飄去住雲歸岫處處圓明月在天

亦欲從師了耕種縣南郭外有良田

九皋亭

九皋界分與天寬小小園亭輒憇安門外圖書聊作府  
庭前花卉頗宜闌清懷不遣塵埃到好句留將久遠看  
放鶴從教雲裏去也應回顧此江干

疊葉梅

羅浮夢斷杳無蹤水雪仙姿兩兩逢縞袂怯單寒後襲  
粉粧嫌薄曉來濃迎風一笑知顏厚臨水相看見影重

道眼只將平等視玉環飛燕總天容

洪賓客席工次韻張希

遼海烟霞縹緲間千年老鶴未飛還  
聲名籍甚東園皓氣象蕭然陋巷顏  
韜卷風雲隱城市依乘日月照區寰  
不應便作歸來賦政要六鰲擎五山

贈劉浦雲相士

波流萎靡半詆諧道骨仙風孰鑒裁  
天壤已無機發踵地爐謾有火留灰  
偶然鄭浦神巫見疑是華山高士來

石鼎煮茶清話久夜闌一枕鼻如雷

題橘隱棋師

一片機心要勝伊兩家敵手肯饒誰塵間戲事何為者  
物外高人亦有之四老果如神變化二龍應笑俗鼓痴  
空花過眼俱成幻無色界中觀此棋

道山詩

田環湖水帶溪灣彷彿瀛洲海島間地上雲烟接天界  
壺中日月照人寰百年竹木青春在一院香花白晝閒



只怕名韉牽引出雙成  
悵望幾時還

送國子伴讀倪行簡赴京

潏潏浮杯泛九霞  
還家未久便辭家  
出門惻惻重闌遠  
前路漫漫萬里賒  
不怕狂風妨去鷁  
偏愁寒月照栖鴉  
諸生凝望須君至  
共賦新詩賞雪花

送盱江朱仁卿省親

貪天外慕一浮鉞  
愛月中誠百稱金  
萬里春暉燕雪勝  
六年宵夢楚雲深  
何煩陽子為忠訓  
忽動何蕃純孝心

歸去斑衣無限樂冬初吾舸亦南尋

和齊年徐宰韻贈傳神黃義卿

地濶天高物物容未容汾曲老王通低頭自覺衰顏久  
對面誰加點染工俗狀塵深羞鏡裏藥爐灰冷在山中  
幾時割取好東絹寫我齊年作兩翁

孫提點舒嘯出示前姚司業南棖寫詠軒詩帳  
斯人之不復見次韻以寓感慨云

鸞仙縹緲度西山軒外千年水一灣孤鳥長空雲淡淡

二蟲小知日閒閒黃塵滿路遊雙鬢丹鼎何人鍊九還  
惆悵詩翁留綺句依稀真界鎖玄關

寄題節孝先生祠

簾掃莓苔出斷碑輦將松柏構新祠幾年節孝先生行  
一旦淮南錄事知信是清門守家學能於濁俗拯民彝  
何當俛伏陳嘉菜喜為陽侯遠寄詩

答揚州盛子淵

多情示我四感興久別喜君叅悟真視聽兩忘尤貴默

貪痴淨掃莫留嗔已知身外總長物且得家中有至珍  
處處揚州好風景瓊花常占十分春

送龔舜咨南歸有序

舜咨一出游觀京國畧不動世俗利名之想浩然而  
歸其志趣之超邁可尚已詩以餞行

男子初生射矢蓬已包六合在胸中往年南北一江限  
今日車書四海同快甚雙眸窺宇宙鄙哉百計入樊籠  
浩歌歸去渾無事栖碧山前月上東

詩贊榮侯父子讓官之美

曾聞榮子猶然笑爵祿真同毳羽輕總總中人慳遠識  
區區物外起紛爭君恩及嗣寧私我父母如天合讓兄  
太伯伯夷俱第一世間列傳與齊名

題陳西樓記詠集末

有序

樂安縣之水西流三十里為界川陳氏世居其地  
前有魯卿以西號其園有國明以西號其樓魯卿之  
孫國明之子定甫預胄監所貢士宋嘉定以後元大

德以前題詠西樓者殆且百家俱當代顯達名勝之  
筆天時人事凡幾變更而定甫有子有孫保守斯樓  
百餘年猶一日襲藏昔人詩文至今罔敢失墜噫西  
園西樓二公之所積以施于久遠者其何如哉同  
郡吳某識于西樓記詠之卷末

東川混混邑西流前有西園後有樓五世兒孫兩朝事  
百年風雨幾番秋山間故物天心月卷裏詩人海面漚  
誰似君家奇寶在金膏水碧古今留

和竇神清惠教韻

觀海難為湖與江兩間濶視更誰雙達人慣見鯢擊水  
癡士可憐蠅撲窓並轡何時追日馭戴盆終日望天杠  
嗟予耄耄君亦老敢比當年葛拜龐

宣尼吟

勸王一語嘗非孟孰識宣尼更遠謀才說在邦兼四代  
有能用我即東周楚惟令尹終難及衛有封人見最優  
迺賜與由俱解此惜哉吾道竟悠悠

贈朱法師

有序

中和守素真一法師洞真觀提點朱善正心淵能秉  
誠心運真氣以感天地召陰陽祈雨輒雨余在金陵  
知之稔矣從天師北覲天師奉旨祈雨遄獲應驗法  
師與有力焉歸有日詩以贈之

往年曾客鳳凰臺稔聽吾師救旱災舒掌掌中雷走去  
舉頭頭上雨飛來每嗟魃鬼火六合誰借神龍水一杯  
袖有甘霖岩下隱如何閒却濟時才



又

泰定再春花趁開顒顒膏澤潤枯荄  
吾皇閔雨雨隨應  
仙伯籲天天未回後載進瞻新日月  
先鞭驅起舊風雷  
歸尋洞府還真隱翠栢丹桃次第栽

玄鑑言命詩以謝之

玄空一鑑衆星羅奈此塵寰休咎何  
未信唐賢厄南斗  
又從宋代惱東坡萬生胎息蟪衣衣  
千古盤旋蟻磨磨  
化化中間藏不化憑君細說總由他

題大乾廟壁


有跋

大業龍舟竟遠巡義寧孤媚忍欺人北方各署新年號  
南嶠猶遺舊守臣身合沉江甘殉楚心知蹈海勝歸秦  
塵間俛仰幾楊李樵水東流萬古春

隋大業十四年戊寅泉守歐陽公官滿歸至此  
夫婦俱溺水死時楚林士弘長樂竇建德魏李  
密定陽劉武周梁梁師周秦薛舉涼李軌梁蕭  
銑各已僭號割據而唐李淵迎代王侑帝于長

安是年二月江都有變字文化及立秦王浩五  
月李淵王侑而自帝以隋為唐王世充以越王  
于東都公洛人也將安歸乎生蓋不如死矣噫  
公之心誰其知之後六百七十七年春二月朔

題壁



吳文正集卷九十四

欽定四庫全書

集部

吳文正集卷九十五至  
七

御史<sub>臣</sub>邱文愷覆勘

武英殿纂修原任編修<sub>臣</sub>吳裕德

欽定四庫全書

吳文正集卷九十五

元 吳澄 撰

韻語 七言律

次韻息窩道人

三年隻影落天涯  
望極南雲眼欲花  
道上已驚仙枕夢  
河邊誤泛客星槎  
棗梨秋熟供新飯  
桃李春榮滿舊家  
喜得息窩消息好  
黃金粲粲待披沙

次韵彭澤和縣尉讀書岩亭

怪石峻嶒自可尋，劃開巖洞更幽深。  
隱仙書響烟雲散，太史字痕風雨侵。  
舊迹一朝成偉觀，新亭六角面穹林。  
孝廉作此千年計，淨洗世間塵土心。

次韵酬彭澤和縣尉

石仙種橘舊成林，孝子和侯重按臨。  
自是儒流為政別，超然德度感人深。  
底僚此日塵中跡，卓行他年史外心。  
客有奇逢癡不去，天風浩蕩更秋霖。

徐道川次文生韻仍韻奉呈

北行往往值齊年先後冥符豈偶然却幸筋骸尚康健  
又將步武接英賢行藏非我由天意久速何師賴聖傳  
況有蘭金同志在芳香彌烈守彌堅

歸舟次韻徐道川

齊來齊去好齊年只覺吾廬愧此川西日不淄持釣手  
南風初試阜財天一舟汎汎身無繫十畝間間里有田  
尚欲超然遊八極可能共我話良緣

寄濟州張脫脫和孫

聖朝厚德徧穹垠  
驛置舟車待小臣  
弊倖宜防須特職  
選掄不苟得儒紳  
家聲藹藹千人傑  
客席溫溫四海春  
郵吏向予談盛美  
短詩聊此寄情親

長蘆岸阻雪次韻張仲默

二首

忽地瑤華數尺深  
天工妙手敏如針  
無聊客子興長歎  
有思詩翁動短吟  
誰與推蓬問僵卧  
自驚潑水透重衾  
轉旋真藉毫端力  
早起瞰陽破沍陰



又

不管嚴風滯去舟且欣初雪兆豐收茫茫一白迷荒岸  
炯炯雙清盼勝流似此人間豈塵鏡恍如天上有瓊樓  
雲間日出情尤快千里金臺瑞彩浮

又次韵張仲默

官卑祿隱儘年深古意常存不薄今本本原原知問學  
篇篇什什亦歌吟後生習氣多紈袴先正流風一布衾  
志合豈辭千里遠相期晚歲共分陰

壽董中丞

直氣貞心命自天風霜老栢正蒼然將千萬世壽吾國  
先五十年生此賢甲子肇新初日度丑辰依舊斗星纏  
邦基身世同悠久敢賦崧高第二篇

疎齋廬學士和郝奉使立秋感懷余亦次韻

二首

斧威直指可能禁鼓吹從容翰墨林公館月簾秋澹澹  
誰家霧閣夜沉沉喚回千古南樓興付與兩翁東楚吟  
休道鐵心猶解賦要人識取愛梅心

又

政爾煩歎不可禁秋聲忽忽動鴉林好懷恰與清風值  
浮翳俱隨驟雨沉江上清楓頻入夢淮南幽桂又聽吟  
閑雲淡漠元無繫來去常如見在心

又次韵謝疎齋和章

昏倦群魔政巨禁忽然驚起立如林初聞仙樂空中下  
細認香材水底沉有句可陪薇閣老何人敢效玉川吟  
兔絲謾附千尋上喬木樛垂見古心

夜坐四次韵

物情自適更誰禁  
草際螢飛鳥宿林  
魯叟爾來無夢寐  
蜀莊此去只冥沉  
客中又見秋風起  
夜半初聞木葉吟  
涼意逼人眠不得  
坐看孤月到天心

晝坐五次韵

靜中不覺暑難禁  
况復身居七寶林  
槐國避焚封蟻出  
石盆趨冷戲魚沉  
蚊將伺暮深深匿  
蟬未知秋懇懇吟  
只有道人方燕坐  
清香一縷起鑪心

石泉法師來自天京朝士有詩道其雨晴感應  
之速玄玄道判率予繼作遂亦不辭

廣陵倦客困炎埃聽得仙官天上來歛歛陰霾見星月  
尋常掌握挾風雷居然三日祈禳事可是明時變理才  
朝士有歌吾亦喜豈無餘福及埏垓

有畫影談命人於真州厚獲而去其門弟子繼  
來

獨巧真堪駭衆愚有言有象立成圖天機往往多奇中

人事來來亦偶符每見賄訖叢開市又聞細載去通都  
老蒼已辦田巴計却喜升堂得是夫

客中即事次韵元復初郊行

二首

急雨連宵井也渾城居寥落似山村停披儘看書堆案  
絕飲空餘酒滿樽日有虛皇相伴侶時逢嘉客細評論  
青燈一室長如晝未覺門人四野昏

又

客中又過二分春聞道千紅百紫新雨到庭隅長芳草

日窺窻隙弄游塵懸知萬里只如此孤坐一堂還可人  
不信却須凌倒影九天樓閣倚長身

次韵元復初飲歸

茫茫大地一漚浮底是劉家百尺樓紅綠春來春去樹  
清渾雨後雨前流所逢偶爾難追覓此處欣然即勝游  
最喜江南山色好晴雲無意自蒙頭

次韵劉縣丞漕運述懷之作

漕向西來數百艘塵囂煩委雜朋曹量收庾積方贏取

水惡風狂儘獨勞  
自顧壺中一粟小  
回思庭下二松高  
北山詩作東山廢  
好句聊堪昇海濤

次韻博士牛吉卿

隴西公所揖升階  
頗意前時與子偕  
知有啼號惱韓愈  
喜無竇徑誤高柴  
官優難曠存深慮  
病起能詩見好懷  
此去天君常泰定  
客邪誰敢寇形骸

次韻送袁惟一遊盱自鄭館

已知柔日卜辛丁  
將破盱雲訪老程  
人事古來難甚快



天容今夏更慳晴，倘經華子宜留句。  
偶會麻姑亦寄聲，未許先生終嫁衛。  
早還鄭圃共尋盟。

次韵謝友和 二首

不作常途計，有無信知律。  
令要詩書堂，堂手捧諸侯檄。  
款款躬尋處士廬，偉器期君天下用。  
名談慰我客中居，文章時出聊遊戲。  
更待他年報政餘。

又

公館逢迎眼倍明，相山堂上曉風清。  
飽聽江練新詩好。

轉覺濠梁逸興生  
柱後法冠他日服  
案前書策舊時檠  
三千牘裏有此客  
未要津頭便送行

次韻餞胡器之挾詩府驪珠遊江左浙右 二首

疊疊青山曲曲溪  
客來恰值主人歸  
推吾謬作劉公是  
知子可如陳去非  
悟處蛇蝎遺脫殼  
看時翡翠好毛衣  
清朝若定詩流品  
指日雲霄向上飛

又

滿篋驪珠未是窮  
照人海蜃眩青紅  
慎投休惹群盲恠

妙貫終須一線通至寶千年存異玩  
圓機觸處得玄同  
雪天送子江湖去春水生時吾亦東

贈謝兄遊齊安

謝氏蘭階有此奇鄭公樗散是吾師  
不甘鄉里浮沉老  
忽作江山汗漫思赤壁千年遺舊迹  
黃岡一日遇新知  
為余喚起蘇仙夢明月清風無盡時

用魯山段錄事和李簽士丁麻姑韻時段奉憲

檄賑濟

卽輒藍輿從事衫泥途滑滑石巉巉急援野草填溝壑  
敢避行難似隴畝春氣頓回萎草木長林驚見古松杉  
一夫弗獲真吾愧誰道魯山非傳巖

秋孟讀書林中觀梅追和主人十疊之歌

二首

讀書林裏樹林林獨向梅邊著意深入愛說香蕪說影  
我看成實又成陰境清遠却炎炎氣仁熟中全白白心  
他日風霜冰雪後約來花下重追尋

又

黃金脫帶綠成林春在梅根深更深已悟坎宮藏一白  
從教否月長三陰殺機密密含生意實腹存存得本心  
無日無時不陽復識花試向朱開尋

潛庵蘭思有倡和以示天慵而不以示余次韻

索之二首

南榮漑漑簷牙雨北牖颼颼紙背風坐久從教更漏速  
灰深宿得夜爐紅生來意氣都虛喝老去情懷似小童  
頗恠詩筒俱走遍隔牆有耳却成聾

又

冷窻兀兀坐無惊聞有王風續鄭風老我自知才思薄  
羞人斗覺面顏紅不嫌官舍啞寒客只怕詩家斥牧童  
唱和喁冷俱變滅到頭萬事付真聾

仍韻奉答潛庵官長

自笑此生如斷蓬飄飄偶爾逐長風鑿通隣壁一罅白  
分得書燈半穗紅韓輦詎堪儕陸老蘇門可是進黃童  
公曾四問伊人否愧我形骸尚瞽聾

送敦教授之英德

庾嶺梅花歲晚幽送君遠客嶺南州單車發輒雲霄路  
好句留題烟雨樓消解炎風成冷澹磨礪恠石作琳球  
聖恩敦遣光文化倘比唐蘇是勝游

送空山雷講師門人丹陵胡道士游京師

二首

玄經一足獨侯芭寂歷空山宰樹華大半門人立霄漢  
尚餘吾子卧烟霞小心慣煉補天石大膽能剝蝕月墓  
去去奉書三詣闕却尋句漏問丹砂

又

遠遊誰為賦新篇  
來自丹陵小洞天  
拂日一鞭聊復爾  
御風雙袂已飄然  
快看鵬海三千里  
早證龍沙八百仙  
莫戀射熊春夢樂  
贈詩人在斗牛邊

次韻胡器之問病

鶯聲睨睨燕差池  
春到閑中日更遲  
偶躡清都陪淨侶  
誰知勝境即良醫  
屋山月上元無夜  
樹杪風來似有期  
坐客屢談渾忘答  
問余還職在何時



題倒騎驢觀梅圖

玉妃一笑本無猜  
拗性驢兒去不回  
見面可憐交臂失  
留情聊復轉身來  
月凝絕艷駸駸遠  
風送清香款款陪  
雪裏吟翁吟弗就  
過時却與惱癡猷

次韻袁惟一寄贈

薄伎聊堪比旆陶  
分甘負儋誤乘輶  
每慚搏櫟妨賢路  
不廢蒟蒨荷聖朝  
雨露恩濃難報補  
烟霞疾痼匪虛驕  
多兄舊逕猶存菊  
紫蓋雲深望眼遙

次韻浩齋喜雨

巫鬟何許會爭憐甘澍真堪當醴泉才士幾分消渴病  
衆生一霎喜懽緣已聞龍德撫八極佇見鴻恩漲九川  
好借餘波供涸硯鋪張雅頌萬斯年

題西峯隱居

悠悠好景寄桑榆老向西峯自校書爭席樵夫便狎坐  
振衣穉子任懽趨花香靜晝微風裏草色深春一雨餘  
城市通儒日沉醉還知醒眼看吾廬

寄題桂溪陳氏山居

斗邑西來谷可盤  
天教隱者宅其間  
縈紆幾曲桃源水  
突兀一拳蓬島山  
竹樹百年清蔭在  
圖書四壁白雲閒  
日長自對聖賢語  
雞犬不驚人往還

偶次韻何太虛九日寄皮昭德時太虛將往觀山  
因阻雨留清江鎮余寓芸香樓

故故誰將冷雨催  
雲峯雲女是良媒  
不教每日乘標去  
應為今朝泛菊來  
遠岫冰餘增點染  
枯池滿後足渦洄

樓中有景無人寫留取新詩待子回

白雲亭詩

并序

衆山皆萃一峯尊峯頂新亭扁白雲百世清風松獨嘯  
千春化日草長醺底湏天上別境界未覺寰中多垢氛  
北望悠然識親舍神仙元不離人羣

樂安天授群山之間一峯巍然名靈寶山有  
四仙祠託焉山之北趾富者代興昔陳令游  
寔主茲山游氏弘道既新仙館道寮又構一

亭以望親舍扁曰白雲將求四方之能詩者  
賦之弘道年少才優事父兄不違禮無世俗  
子弟之好而翛然有塵外雲山之趣清致如  
此是可尚已

禱雨次韵酬袁惟一

晝日如焚夜薄寒早苗已穗欲枯乾  
荐饑忍見艱庶食獨飽何能樂一簞  
自顧人微耕草野聊同巫舞禱雲壇  
老鱗挾得千年雨投鐵靈湫亟起蟠

盱江童氏重修喜清堂

綠樹紅芳映酒卮  
朱甍屋瓦照清池  
百年老監善占地  
三世聞孫肯棄基  
浩浩乾坤千劫裏  
巍巍棟宇一新時  
相銜扁字俱塵土  
消得江山入好詩

次韻王學士七夕新秋

二首

煌煌桴鼓引雙旌  
道是天孫大禮成  
金鏡南飛光欲半  
銀潢西去寂無聲  
佳期一夕誰人見  
淫思千年事未平  
最恠河東五星麗  
却嫌抱拙要中更

又

夜來天闕透清香  
桂露蘭飈冷逼床  
肅肅刑官傳令到  
炎炎酷吏去人忙  
鷹鷂橫擊老逾健  
狐兔深潛類自傷  
聞說南樓新月色  
江湖萬里動寒光

王承旨壽日

雲漢分章作世禎  
此時此日鉅儒生  
千年嶽瀆靈光合  
萬里乾坤秋氣清  
滿月有輝仍似昨  
彗星無數敢爭明  
皇猷帝制閒中事  
論道經邦要老成

寄題醫士陳氏意齋

百千萬變十三科  
泥古方書柰病何  
看取慈親求赤子  
有如姍女藉黃婆  
重輕按舉精思巧  
加減稱停活法多  
此妙不傳君獨得  
可能紙外覓機佗

次韻吳真人題侯講師損齋

已知無患在無身  
諸妄俱無只一真  
淨盡千林搖落後  
長流萬古發生春  
目官窅窅成朝徹  
鼻觀深深養谷神  
我亦易中研八卦  
喜從方外見畸人



題許氏時思堂

庶人於寢士於廟事死如生遠可追三世孝心傳百世  
四時享禮帥初時記文炳炳眉山筆家範優優曲沃規  
我欲因之敦薄俗不能自已更裁詩

賈參政壽日 二首

相業傳家幾百年天心為國產英賢岱嵩律萃青千古  
溟渤渟涵會萬川垣北紫微瞻正色斗南黃道次新躔  
許謨辰告從容了誰信金門有隱仙

又

比山比阜比岡陵仁靜如之壽作朋恒月半規圓有漸  
臨陽二畫進方升回頭舊臘家家餞轉眼新春歲歲增  
妙運所期裨造化八荒一域慶同登

次韵楊司業

東風絃管沸樓臺處處游觀闌往來散地一般春意到  
後園幾樹好花開發舒情思將詩句領畧芳香付酒盃  
擬辨賞心酬美景呼童先與掃莓苔

次韻楊司業喜雨

好雨冥冥濕軟塵  
雪花艷艷更同雲  
蘇醒地肺萎枯脉  
點綴天涯浩蕩春  
九奏召和符氣數  
六龍在御慶華勲  
帝功不有歸玄造  
玄造無言跡已陳

寄題許氏文會堂

四海文游萃一堂  
講論不在泥篇章  
知為糟粕書奚貴  
悟得筌蹄易可忘  
染就恐緇域素亂  
真休眩臘鞭黃  
紛紛只說三槐記  
指擬功名付二郎

次韻楊司業芍藥

寒冱深冬宿異根，發榮今日謝春恩。  
淺潮半醉流霞暈，清印初昏淡月痕。  
花下蜂狂成勝集，草間狼藉倒芳樽。  
紫芝興味亦如此，誰信京華有綺園。

次韻楊司業牡丹 二首

誰是舊時姚魏家，喜從官舍得奇葩。  
風前月下妖嬈態，天上人間富貴花。  
化鬼他年鎖子骨，點唇何處箭頭砂。  
後庭玉樹閑歌曲，羞殺陳宮說麗華。

又

公詩態度藹祥雲綺語天香一樣新  
楮葉雕鏤空費力  
楊花輕薄不勝春  
老成此日名園主  
俊乂同時上國賓  
樂事賞心涵造化  
撥根未遜洛中人

題某翁慶壽詩卷

平生真樂在田園  
貌古心淳内外全  
有子有孫天上福  
無榮無辱地行仙  
義方何意祿三釜  
仁靜收功壽百年  
多少歌詩談盛德  
翁應一笑寘牀前

次韻寄揭浩齋

遽使倉忙辨去船  
目隨賓鴈到南天  
懸懸兩地懷冰鑑  
袞袞諸公事債泉  
宇宙無涯悲往日  
田園有興待來年  
浩齋風月今何似  
萬一分留肯獨賢

送王國卿博士提舉陝西儒學

文公東北曾分陝  
宣父西轅未到秦  
百二山河應似舊  
一千年事幾更新  
雍田上上古無敵  
髦士我我今有人  
國子先生時雨遍  
萬家烟柳露桃春

題送耿子明還家養母序後

三十娶居九十康斑衣兒子鬢毛蒼桃分仙實來西極  
萱老春花瑞北堂萬里遠遊雙足倦百年終養寸心忙  
蹇予風樹嗟何及為爾重歌不匱章

題曹氏褒德集

蓬鬢蒼蒼適子孤追揚父美孝如初庶平一世文無害  
醫治千家惠有餘陰德將期駟馬蓋多方已富五車書  
阿誰能為作佳傳笑指空鉶問粟儲

曹彥禮易齋

先天河瀆龍馬出中古岐山鳳鳥鳴往聖一心開秘牘  
來令萬世覩文明能知身內有周孔豈謂人間無卻程  
三復曹君易齋說名齋難處是難名

題徐妻趙氏貞節傳後

為夫終養志難酬代戍無丁重有憂家地雖寒兒可待  
所天或二妾誠羞堂堂烈婦道應爾哀哀文儒說未收  
誰輯世間貞節傳品量特筆擬春秋



題徐威卿學士贈呂子敬總管三詩後

薦賢學士久黃壤投老使君猶綠眉處處甘棠思美政  
言言華袞見三詩他年循吏誰能傳當日行人口有碑  
厚施在民應厚報天教上壽過期頤

壽詩

貳公弘化得真賢妙斡陰陽燮理權千載台星應申嶽  
一時臘雪瑞堯天豐登氣象人皆睹參贊工夫世莫傳  
又起初元壬子歷年年皇慶太平年

途中代東監學僚友

疇昔何曾三宿戀如今已是四年淹  
朝廷禮意不相薄  
朋友歡情殊未厭  
日月無私光普照  
烟霞有約分應潛  
歸衫鳥哢花香裏  
處處春風動酒帘

朝回再次韻

風吹僊樂下瑤臺  
闔闔中間翠輦來  
雲擁紅光千丈遠  
日行黃道九天開  
百官星拱環金闕  
萬壽雷聲進玉盃  
已覩太平新氣象  
四方犴獄長春苔

題簡齋陳參政奏藁後

有跋

君臣密勿紹興中文物依稀貞觀風三幅奏篇存雅製  
諸家題字總名公已聞玉匣人間見空想銀鈎天上工  
百八十年如一夢摩挲遺墨視夢夢

紹興參政簡齋陳公奏藁三幅其一謝御賜  
臨王羲之玉潤帖其二為奉旨辨歐陽詢書  
真偽淳熙紹熙葛周洪尤謝楊章樓以至慶  
元嘉泰開禧諸名公題跋者凡十八人蓋百

八十年於茲矣澄得肅讀感慨繫之臨川吳  
澄謹書

次韵酬劉監簿

本來麋鹿樂邱山何事駕駘絆杙桓  
哿矣西疇趨東作偶然北海便南搏  
道邊老木留遺蔭江上清風動去瀾  
君向洞庭栽彭蠡水天萬頃共清寒

題御史謙齋瑞竹卷

相君遺下公安種御史重開私第祥  
幻作靈根長枝葉

顯教清節傲冰霜貞心匹配朱家栢餘蔭依稀召國棠  
如是四時如一日共看耐久保青蒼

次韻息窩道人遠寄 二首

飲罷金盤玉露杯和陽消息到寒梅月華夜照崑崙頂  
雪浪春融灝瀨堆此事一行嗟便廢迷途未遠幸歸來  
高齋久久高人跡砌面重重封綠苔

又

參同遍萬復同千早見師兄發秘傳小智詎覩海鵬化

大方應笑野狐禪  
息窩對榻知何日  
衲被蒙頭記昔年  
只作平常不奇恠  
金光明藏聖功員

吳文正集卷九十五

欽定四庫全書

吳文正集卷九十六

元 吳澄 撰

韻語 七言律

送人遊武昌

丈夫落落志四海俗士拘拘守一途  
羨子春秋當壯日  
結交豪俊必通都  
孤舟驚浪千堆雪  
片紙長江萬里圖  
歷覽山川俱遍了  
歸來我欲問今吾

送談星命者往武曲

而父當年挾策遊高談雄辯藐王侯世傳法筏得三昧  
妙悟圓機說九流七緯合離天漠漠百生禍福水浮浮  
唯應黃鶴樓前月照古今人春復秋

贈僧遊廬山

安安穩穩萬年枝更覓禪林何處栖夜雨葛藤新長蔓  
春風柳絮未沾泥擬將江水一吸盡要與廬山千仞齊  
若問西來祖師意家園枕上曉鶯啼



贈羅心遠

拋却儒書出四馳  
談星說數舌如箕  
言言微中人爭慕  
落落多奇子自知  
海內清平應大遇  
溪邊邂逅適今時  
轉鈞造命非吾事  
欲贈無財且贈詩

贈杏林吳提領

董仙採石頻收穀  
石子成名亦悟真  
重見杏林林下客  
賸分梅嶺嶺頭春  
一心惻惻生慈憫  
萬命懸懸正苦辛  
我欲乘風問良相  
急投刀匕活疲民

寄題饒氏西園

近拜陸祠過東館遙聞饒氏有西園  
象天喬木千年代遍地名花遺子孫  
雪檜霜松期歲晚露桃雲杏趁春暄  
我生亦坐林泉僻何日飛來共一樽

贈談命人熊景仁

畏日蒸蒸汗沃漿忽移熱惱作清涼  
定非戰國談天衍疑是仙家縮地房  
小住百年聊戲劇大超萬劫有真常  
眼前富貴飄風耳此命堅牢最久長

追補楊唐州挽歌

清風爽葉盛簪纓共歎君侯好弟兄家難未平千載恨  
州麾豈羨一時榮樹風夜撼凝香寢礎露朝騰載路聲  
報施如今天已定鳳毛進進九霄程

與郭友仁

賣得詩珠擬療貧傾家豈意為陪隣逃亡已不升新穀  
貪取猶將過百困門下有誰能市義里中無處可依仁  
爭如跳出樊籠外粒粟應藏自在身

贈地理鄒晞陽

單衣隻影若羈縻，棲至寶携持欲向誰。  
剛有天資剛有志，善談地理善談詩。  
王門海濶裾徒曳，寒谷春遲律試吹。  
認得田園真樂處，歸來堯舜是吾師。

和元夕觀燈

霞珮翩翩禮太清，星毬燦燦簇華燈。  
恍如天上通明殿，豈是人間傀儡棚。  
仙樂風飄浪韻遠，御爐烟裊異香騰。  
新年共慶春和早，屋瓦無霜水不冰。

和陸景薦二首

自有人心百世公義門舊地築新宮寒霄宇內千蹊黑  
宿火爐中一燼紅我信先生猶不死誰知衆異總相同  
悠悠此道今如線無質空存斲鼻工

又

陸家賢盾世情疎頗或憐才命載車皜皜曾聞濯江漢  
亭亭詎肯染泥淤靜觀天下輪雲事珍貯胸中祖父書  
一任歸車徒四壁知君斷不效相如

次韻別文穆

曾憶真賢也屢空身貪心未為窮山中得得逢初雪  
筆下超超擬變風更有來今千載事可無往古十分功  
相期不盡輪困意行色催人子又東

和答枝江令何朝奉

有序

枝江知縣何朝奉在桃源別墅有詩貽贈時  
予服道士服讀書巴山之陰何詩末句云泗  
上簪冠終不作子房久矣赤松遊用韻奉答

四首

弱柳疎桐不柰秋  
蒼蒼松柏自難儔  
向來花縣留遺蔭  
今去桃源卜一邱  
無計參承空有慕  
有言貽贈敢無訾  
詩才雖短猶能賦  
何日山林得共遊

又

生平闢老凜如秋  
一旦番成老氏儔  
晉士無心入蓮社  
楚纍有興托丹邱  
遁身詭姓聊依附  
設行淫辭甚寇讐  
土木形骸雖混俗  
高人靈府與天遊

又

戰國于今幾百秋韓臣有子莫能儔傷心牛後資談柄  
杖淚虎許成故邱袖鐵沙中非失計授書圯上遽忘雛  
籜冠縱有興王分良豈甘從赤帝遊

又

世無孔子作春秋良遂儕諸平勃儔天授雖然遇龍德  
棧燒終是首狐邱非為漢用為韓用既報秦讎報項讎  
不是功成身始退早年黃石已從遊



送李春谷往受道錄二首

龍虎山中紫翠烟青精顏色四時妍桃枝慣見枝成實  
蓬海空聞海變田五斗米仙真有道一神樓藥豈無緣  
秋風吹綠茂陵草的的黄金飛上天

又

翩翩佳客破炎蒸陡覺清風四坐生敢道未平仙鶴卵  
前知應笑野狐精最多能候成諸幻不二門中只一誠  
此去徧參方外了歸來孔壁日星明

貢院中和張仲美

牆外浮屠壓古城案頭文字浩縱橫  
不辭霜鬢年華老又辦天朝歲貢英  
秋隴故園迷蝶夢曉窗客枕厭雞聲  
何當孺子亭前去省想高風浣俗情

九日登樓

黃葉黃花競獻新德星來聚此相親  
雲烟暮色樓頭眼風雨秋聲客裏人  
詩興悠悠千載事酒盃盃盃一時春  
共期白首各自愛莫負乾坤八尺身

貢院校文用張韻 四首

棘園校藝日如年生怕談經說用燕執筆敢矜修月手  
稱心得似順風船鑒衡遇物元無意竹帛書名固有天  
裁決至公還似樂齋詩何惜費長箋

又

文弊東都六百年初唐猶似說張燕障川亦有回瀾手  
航海應無到岸船韓祖蘇孫星北斗周情孔思日中天  
與君共此談生活弊帚千金一幅箋

又

水驛相逢記昔年長蘆飛雪暗全燕  
棲遲闕下長聯步  
顧望山中各問船  
一去幾經槐國夢  
再來共對菊花天  
此行又別何時會  
倘有賓鴻數寄箋

又

與君相聚各耆年  
世路從渠自越燕  
元不東陵千戶食  
底須西子五湖船  
牛刀綽綽存餘地  
雞甕區區看隙天  
似此唱酬亦云樂  
賸磨濃墨寫吳箋

和韻雙頭白蓮

花中君子志同芳  
簪合蘄流百世芳  
允智雙清耻周粟  
皇英競巧繡虞裳  
房蜂共帶各生子  
囊麝連臍不斷香  
絮白二難相伯仲  
難分誰苦又誰良

又

花神亦有弟兄行  
幻出亭亭並帶芳  
二佛同敷獅子座  
三閭賸集大夫裳  
金莖單捧雙盤露  
玉笋分勻兩臉香  
肥白陳平羞獨美  
齊名要共一心良

彭澤水驛和虞脩撰

此非元亮幽居處而喜亦無車馬喧澍雨一時蘇鬱熱  
流風千載挾清寒秣田舊治民猶昨柳岸新亭客避煩  
江面波神應冷笑魯聞容膝可偷安

登孤山

有序

延祐五年秋與伯生脩撰憇彭澤水驛值江  
州推官畢侯來審因棹舟登孤山有彭簿劉  
尉同遊因賦五十六字

三十年前東下時  
閒逢曾賦小孤詩  
風濤如許相衝激  
天柱迄今無改移  
長願江流平似鏡  
坐看舟客去如馳  
悠悠此日登臨意  
付與潯陽循吏知

題彭浪廟

絕岸孤峯已是奇  
彭浪對立儼相持  
海門第一關如此  
山嶠幾多人未知  
險勢踰來似平地  
安心贏得賦新詩  
長江渺渺東流去  
會障狂瀾更有誰

重題峨眉亭

一亭突兀枕嵯峨此地曾聽月下歌天上謫仙歸去了  
人間行客重來過荒荒宿草橫邱隴浩浩遊魂幾浪波  
二百餘年招不得溯流赤壁問東坡

次韻答謝玉溪求墨

點染曾霑帝闕香歸來誰復寫凡將已慚友我無餘潤  
那得分人有寸長天與玄玄傳道妙時看猷猷發文光  
相期共印千年事遲鈍研磨不要忙

用韻酬梅月翁 二首



梅如冰玉月如杯月十分清更著梅湖海舊盟鷗鷺社  
田園晚趣鵲鳩堆誓將結屋鄰翁住喜見携詩為我來  
何日得同花下飲不妨醉倒卧莓苔

又

踏遍東南路幾千詩名少日已喧傳老成更誦河亭句  
脫透真如曹洞禪尋究宗親知共本挨排行輩肯忘年  
尚期分我梅花月生怕羅浮夢未圓

癸丑生日次韻酬黃山長

擬進華筵酒一鍾將行復止謾匆匆先天愧我十年長  
初度偶然正月同政為蓼莪懸講榻又傳梅使寄東風  
有懷不寐夜參半熠燿文星麗碧穹

寄題胡氏園趣圃

地偏車馬少行蹤天濶雲烟萬里通  
本本芥菰餐宿雨年年桃李媚春風  
孰賓孰主園如昨人去人來趣不同  
我亦謀歸理荒徑寄詩先到峴臺東

次韻魯司業二首

麗日中天下照臨  
太平有象適當今  
睿容穆穆崑崙厚  
聖度淵淵渤海深  
忠蓋世臣弘相業  
敷陳治道格君心  
小儒忝綴班行末  
咫尺龍顏奉玉音

又

天聽雖高肯俯臨  
上稽往古證來今  
覆盆局促難瞻遠  
短綆尋常詎汲深  
野老無知進芹味  
朝賢有喜見葵心  
優優教胄歌詩暇  
遺我蕭韶不盡音

澧陽通濟橋

涖溪南北往來衝累石成梁濟不通兩岸步行三十丈  
二年力役百千工蒼茫喚渡閑飛鷁天矯橫空覩卧虹  
朝錫佳名史官記人人傳誦謝家功

題敗荷

并序

聞中丞相公有敗荷甚工緻不見初詩見諸  
人和篇一二依韻謾成一首錄去請教

嬌紅久失六郎張黛綠殘粧更遇霜照影有慙同敗卒  
返竟無計覓巫陽三生傾蓋成憔悴一半披衣墮混茫

畢竟明年青不改依然十里遠聞香

贈游遜仲

有序

曼湖游遜仲有恒產有恒心又無道伎術能  
相地之形勢察人之脉病贈之以詩

兒孫大旺皆因地性命常存亦在人一樣機關一同巧  
兩般伎藝兩通神虛虛實實穴易悞隱隱隆隆脉要真  
家富千金又能此此金無價永隨身

方塘詩為匡廬山陰學道之士朱清逸作

億劫廬山有活泉幽人鑿地敢偷天縱橫四直可半畝  
上下一清藏大圓真景渟涵雙日月幻形變滅萬雲烟  
塵飛風起渾不管此處無波只湛然

贈陽醫士

飽聽人稱李與張名聲新起趙州揚已諳本草攻奇疾  
更遇長桑得禁方一刺能逃癡豎子十全當貳大醫王  
汗顏寸技無知者日月看題檢藥囊

贈洪均

洪門自昔推三秀族子於今守一經拂日能來瞻北極  
乘風送去到南溟發身散地頭方黑當路群公眼為青  
我在燕雲指吳會書燈光射斗牛星

題豫章紫極宮太古樓寄余傳二道士

經今億萬大千劫猶似天開地闢前一物亦無惟混沌  
幾時方有此山川乾坤謾自羲皇始宗祖應推象帝先  
八達四通昭曠眼昏昏杳杳入玄玄

雪巖詩

木長柔枯草長藤鳳凰岡下老雲仍清名寂寂無名叟  
白髮蕭蕭有髮僧晴霰撒珠泉噴薄暮烟凝翠石峻嶒  
寒山生怕人饒舌喚作雪巖渠不謬

贈相地者

葬術相傳自晚唐魯仙名姓至今香已看後輩成前輩  
誰把青囊換黑囊群護降龍來宛轉四橫朱雀去悠揚  
此言易簡人人曉妙在旁搜得秘方

贈術者



來過有客急延茶道是江湖伎術家身瘦恍疑華表鶴  
眼明會捉草中蛇巧思十畝淇園竹麗句三春閬苑花  
似此多能應不困佇看天上泛仙槎

壽周栖筠

家傳茂叔易通書年與羲皇卦畫符貞下起元相續續  
一中生萬又初初儼然大帶深衣客伴此先天太極圖  
又喜歸來隣叟健手持壽酒慶新居

贈金精丁葬師

見丁氏家藏使重書墨蹟

蕭田勝事億冰崖丁族聯姻亦盛哉疇昔笙臺鳳飛去  
只今華表鶴歸來雲霄萬里心仍在城郭千年塚可哀  
玩世玄機饒戲劇混凡仙眼為誰開

又

金精排卦伏羲重傳到丁家易遂東俯察根原該地理  
遠延支派擅天功節停去水便界澤壘壞來山忌內風  
二五正當生氣聚錦囊有法葬其中

又

古哲安墳遺舊蹤  
後人得術紹真宗  
毒眸遠賽天邊鵲  
健足生挈地上龍  
何處無神司采擇  
誰家有福定遭逢  
結廬亦欲娛吾老  
試為雲間覓一峯

金精丁氏昆仲甚盛  
皆以相地之術及吾門  
先祖嘗贈之以詩  
蓋其術得之家學  
非若他人之獵取遺書  
妄自矜大以售其欺者  
故贈詩致託之之意焉  
仲偉重來先祖棄諸孤已  
三年矣  
當以未終襄事日夕為憂  
伏讀前詩

益重哀痛故書諸孫當謹識

吳文正集卷九十六

欽定四庫全書

吳文正集卷九十七

元 吳澄 撰

韻語 五言古詩

次韻湖北程廉使訪歲寒亭亭在黃鶴山下有  
栢一株竹數莖

黃鶴飛不回蒼栢乃小住十年歲寒姿深藏翳榛蕪偶  
然別荒穢幽意畢呈露生本來孤特疆使此君附作亭

以面之相對澹無語雖蒙新知厚頗若違余素人間無  
霜雪天上有雲霧政恐挾風雷一夕化雷去

次韻南阜避暑

淋漓兩月雨悶悶鬱奇思翕赫數日晴煊煊煊厚地炎  
涼與燥濕今昨頓殊異紅塵况囂雜清抱虞點穢可人  
忽來期出郭聊巧避儵然遺俗氛劇談到名理頗訝猶  
龍翁以身為大累要知悟道人隨處得佳致有人傾家  
釀不飲心亦醉西日翳翳沉南風飄飄至之子玉雪標

世德罔失墜能效工部吟肯遊柳州記斯文千載事曠  
代一角瑞莫逆只自知旁觀等容易孰識斲輪工妙在  
不傳意風雲詠歸辭聖者興歎喟從來山水樂獨許仁  
且智高視曠然寬幽尋奧然邃會心各欣欣如口有同  
嗜嗣當賦茲遊附入羅阜志

次韻靈興避暑

書憲候曙色紙白朝復朝自聞雨聲斷不厭日氣歛一  
襟夏簟爽萬慮春冰消空中九畹香飄下襲桂椒夜堂

月影清劇談神境超曉轡露蹄濕前瞻天宇昭靈峯存  
舊迹方士構新寮共尋幽棲勝未計歸程遙忽悟種植  
理嘉禾生柔苗回眸睇仙娥示以髣髴髻叩頭禮阿母  
賜以婉婉嬌泰炊邯鄲枕樹響箕山瓢食已問前路征  
人趣良宵此時別緒惡風纛寸心搖明晨喜機動霞暈  
雙臉潮夢云蘭茁芽驚見梓附喬先期命桐君為子歌  
椒聊登閣望芙蓉麻煙起蒸窰懸如父問子笑語谷口  
鶯親歡怡怡奉客話款款邀廣廈足清美高田尚枯焦



萃翁納溝愧長願陰陽調彼哉隔胸膜養稭自驕誰憐  
作苦者塵甑午腹枵道眼洞一視仁聲徹層霄脫除小  
窠白蛻殼非蟬蛻

贈清江楊信可

往年踈齊老同看廣陵春起予五君詠字字春條新歸  
來西江上始識詩中人騷人已千載此土遺蘭孫吾里  
吳仲谷詩格逼盛唐視子倡酬篇與子鴻鴈行有文更  
奇古腹笥儲三倉清時需髦士佇子天際翔

餞王講師分韻得波字

夫君鸞鵲姿早蔭青青柯天風忽搖落匿影逃虞羅堂  
堂少微翁濶視海一蠡閩山初識君有如歐得坡遠離  
十年餘契義矢靡他竭來漳江濱千里重經過青眼兩  
熠燿白髮各擲抄朝飲共談諧夜燈對吟哦交情政爾  
歡別意今如何謂有神官招道妙相縷覩去去不可留  
船頭漾春波寅軒窓外月清夜照薜蘿頽然一翁老顧  
影獨婆娑我欲丐賸馥亦復成蹉跎目極象山雲仙巖

太差我幸君勿我遺頻寄別後歌

題唐澗草蟲

夏躍難語水秋吟豈知春生不一年計百年影如新澗  
翁今何之見此不見人諸孫視予笑伸紙一拂塵

題熊生篆卷

隸輩趨捷巧人文浸湮沈條網竟昧昧刀筆漫刻深自  
熊氏之孫夢寐史頡心姓名儻可托一字當千金

送謙山大師歸吳興

得此方外友知是吳中奇圓機  
坂流九益盎春浮眉偶  
坐竟日談聽之每忘疲  
倏來謂予去倚閭有親思如何  
初相滅不滅初初曩信矣佛性大  
欲離不可離歸語趙  
學士一笑問何其

題孔知府致仕

賢哉孔大夫年老勇歸去  
喬木嘯清風寒花醉香露  
東門瓜蔓長南國棠陰故  
循吏好兒孫餘輝滿庭戶

談經次韻夏編修

六經在天下浩瀚若河漢東流竟日夜萬世貪漑灌遼  
哉去聖久原遠末益散競持郢書說孰別魯鼎贗鷄鶩  
物之微猶自了晨旦云胡有目人莫覩星宿爛新安巨  
子出豪縷密分辨嗟予童而習弱質少勇悍續綆鉤其  
深事倍功未半吾鄉有奇彥京國逞縱觀顧予薺夢中  
快甚湯液汗妙句發心聲嚴嚴氣魁岸相期五色瓜剖  
實得犀辨

寄董平章

偃蹇百圍栢受命雄以剛常時飽雨露晚節輕風霜昂  
昂參天質鉅任堪棟梁工師不敢材千歲保青蒼太行  
千里青突兀天下望偶然興雲雨變態未易狀神功寂  
如無日月共澄朗相期天久長為世作保障天空濬無  
雲熒煌泰階平太微有垣衛今近少微庭俯臨自炯炯  
仰瞻漫營營中宵狼北望南極一星明

送楊志行赴閩海照磨效其體

負荷出京華息擔憇江介邂逅玉雪姿乘陵塵囂外嘉

名昔屢聞良覲今一快談諧每欣豫晨夕數期會藉此  
懋驕孤明將脩離北天書下司臬海嶠備寮案陽烏方  
赫曦驛騎促俱邁去矣君勿留懷哉我奚賴

題四皓圖

皓首出山來從容定儲宮儲皇已御極論賞將誰同飄  
然拂衣去詎敢貪天功飽茹石上芝坐蔭巖下松商顏  
鬱嗟峨千載餘清風

贈無名名理太古

饒陽太古父事事追太古宋相文正公世近未足數堯  
時大理官庭堅乃吾祖弦操羲皇琴筆繪虞帝黼詩和  
鸞童謠字通韻史詒落落魄中人此事今莫伍雖然君  
四伎猶墮諸有畧厥初無名名聽視兩聾瞽誰哉鑿七  
竅而以閱衆甫復還太古天子欲混沌汝

送涂君歸澗

昨歲抱琴來今茲抱琴去委質隨長風斷蓬與飛絮一  
家蠡湖南一住西湖東兩地各繾綣寸心漫怔忡浮雲



豈無依倦鳥亦有棲迎門穉婦笑索果嬌兒啼歸裝春  
袖薄荒徑春華落理曲到求凰何人悲別鶴

代東曾小軒謝馮筆蠟紙之貺

束縛中山豪寸管入時操幾微見鋒銳可敵古鈐刀江  
人有妙悟匪直取價高坡公詫葛吳蔡藻朱所褒邇來  
浙西馮聲實相朋曹小技足名世屠龍空自勞

又

變化惡木膚用舍堪卷舒蜜脾百花精漸漬鍊治餘外

理透中黃骨澤玉不如甚慚負此寶誰解鍾王書心蘊  
托手畫聊以傳吾徒雖然是糟魄糟魄未容無

又

玉堂揮翰手歸賦田園居牕凡淨無塵四友日與俱分  
畀墮深谷光輝潤蓬廬森森春筍齊澹澹秋雲鋪方今  
圖治棘任使正爾須顧我焉所用卑身註蟲魚

贈趙法師

公明師閩徐禁架妙一世夫君得奇術豈其遠苗裔符

呪撝呵間立已衆疾癘金針刺畫影火炷灸衣袂凡目  
向故常詎測此神異小儒亦驚駭此筆不敢議喚起范  
蔚宗亟與續方技盛年倘遭逢榮顯軋五利

贈人求賻

德甫死數月家貧不能葬其子泣告予聽之為惆悵予  
謂其子曰今日汝宜往汝父在世時滿眼知識廣高閥  
慣奔走所事盡豪與資財既饒裕意氣亦倜儻故人之  
子至寧不動念想生死見情誼直實非勉強應有郭元

振錢送幾萬鎰應有柳仲塗金餽幾千兩堯夫清廉吏  
麥且五百盞阮瞻酸寒儒絹且四十丈彼但抽氈毛此  
已歸泉壤汝其試扣門佇看賻盈帑予助嗟薄少忝作  
汝父黨蘇詩贈李明鄙語謾相倣

題唐隱士盧鴻十志圖

高高地中區下有隱者廬兩微堅不起一至終不渝好  
爵等浮雲還歸對生徒官為營草堂殊恩耀山隅爾來  
數百年十境入畫圖之子服儒服浸淫老莊書翛然有

仙意生白一室虛三宿戒凝戀十境亦可無

題周御史所作梁氏貞節詩後

婉婉梁氏子蚤歸趙州王芳年未三十所天遽云亡  
煢無一息自誓如共姜斬直三年終死穴期同藏姑存  
養必孝姑沒哀逾荒服不施途華步不出閨房當路上  
其事煒煜門閭光客聞視父譽一字三惋傷知子莫若  
父事覈言有章貞詩御史筆凜凜風四方

贈純真張道人

深深息納踵綿綿神在谷小心龍護珠大用龜藏六閤  
戶坤吝嗇殺機天反覆解牛中恢恢顧虎外逐逐尺莖  
可萬世衆輻唯一轂於繁通行仙不緇澆偽俗朝乘丹  
霞飛暮傍青雲宿厭食羊千蹄縱談鷄三足長身白瓠  
美短髮黑漆沐取數已多多成事非碌碌風馭先赤松  
雪歌後黃竹來階石曼卿徃侯張平叔

題畫蘭

孤芳愜遐趨婉婉媚幽人清露浥脩竹柔風弄續紛嘉

名誰肇錫副墨傳千春欲起黃大史問之楚靈均國香  
人服媚可佩亦可紉猗猗空自香元聖為悲辛騷人久  
不作舉世鮮識真哀哉化為茅誰與招湘魂

江西秋闈分韻有序

延祐四年江西府中書省欽奉天詔第二舉  
進士典校文者七人或居千里外或居千里  
內一時縻至來集于茲晨夕相親亦云樂矣其  
將別也能無情乎乃九月九日開尊暢飲

登樓遠眺秋意滿目悠然興懷酒闌以日月  
依辰至舉俗愛其名為韻各賦古詩一首爰  
記良辰會聚之樂且抒異日離索之思焉

一天秋意滿淡泊散微靄羈棲滯公館朏朒忽已再佳  
辰邁九日節物兩冥昧東籬黃花吐應笑我安在天網  
罩羣髦驅使及我輩白袍蟻蜂聚黑字蛇蚓態居然三  
千牘負以幾牛背妍媸屬鏡鑑蹢駁混鉛黛披條索其  
華掇頡紛瑣碎臨文費三思撫几一時慨皇心天廣遠



鴻澤海汪濊猗歟際休明光垢勇礪淬誰能日鉏耨沃  
衍有荒穢繼今獲小成力學期大耐異時國君臣彪炳  
麗昭代此中斷金侶清氣浮沆瀣繼繼膠漆情頤頤瑤  
瑤珮忽謂水華徂共希賢哲配道崇極所躋原德重彌  
載臨別無媚言努力各自愛

登撫州新譙樓

至順壬申十有一月下弦之後登新譙樓緬  
懷王丞相陸先生之流風成古詩一章奉呈同

志諸友

吾邦山水秀雄麗冠江右巍樓橫中天濶視納宇宙懷  
哉二前聞吸料得醇耐身操冬雪明心由秋月穀運轉  
八絃鈞繼續百聖胄純氣古難齊卓卓尚微疚嗟予二  
三友高舉第一手杵糜無色石密補九天漏

至順壬申十一月郡新作譙樓部使者郡監  
若守請先生觀焉先是先生以第三子京教  
授郡學來就養焉登樓後賦此遂出城竟歸

其鄉嗚呼先生此詩之作至於此有不得而  
自己者矣昔者曾子著大學之書言修己治  
人之道而中庸之書則子思子憂道學之失  
其傳而作者也後千有餘年程子曰周公歿  
聖人之道不行孟子死聖人之學不傳道不  
行百世無善治學不傳千載無真儒嗚呼此  
豈可有幾微倍繆疑惑於其間者乎陸先生  
王丞相寥乎天地之間氣卓乎千載之豪傑

殆非臨川山水所得而私者也然而臨川有如是之父兄君子也豈他郡之所可望哉吳先生微疾之言蓋有慨於先哲之所深憂者矣明年六月先生卒嗚呼此集之所謂至於此而不得自己於言者乎先生之門人表明善求集書此因識其後云至元己卯七月既

望雍虞集書

吳文正集卷九十七